

ISTIQAMAH SALEBETING DIRI LAN DAKWAH

DMDI (DEWAN MASJID DIGITAL INDONESIA)

<https://seruanmasjid.com>

KHUTBAH I

إِنَّ الْحَمْدَ لِلَّهِ، نَحْمَدُهُ، وَنَسْتَعِينُهُ، وَنَسْتَغْفِرُهُ، وَنَعُوذُ بِاللَّهِ مِنْ شُرُورِ
أَنْفُسِنَا، وَسَيِّئَاتِ أَعْمَالِنَا مَنْ يَهْدِهِ اللَّهُ فَلَا مُضِلَّ لَهُ، وَمَنْ يَضِلَّ فَلَا
هَادِيَ لَهُ،

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، شَهَادَةً مَنْ هُوَ خَيْرُ مَقَامًا
وَأَحْسَنُ نَدِيًّا. وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ الْمُتَّصِفُ
بِالْمَكَارِمِ كِبَارًا وَصَبِيًّا.

اللَّهُمَّ فَصِّلْ وَسَلِّمْ عَلَى سَيِّدِنَا مُحَمَّدٍ كَانَ صَادِقَ الْوَعْدِ وَكَانَ رَسُولًا
نَبِيًّا، وَعَلَى آلِهِ وَصَحْبِهِ الَّذِينَ يُحْسِنُونَ إِسْلَامَهُمْ وَلَمْ يَفْعَلُوا شَيْئًا
فَرِيًّا، فَيَا أَيُّهَا الْحَاضِرُونَ رَحِمَكُمُ اللَّهُ، أَوْصِيَنِي نَفْسِي وَإِيَّاكُمْ بِتَقْوَى
فَقَدْ فَازَ الْمُتَّقُونَ. اللَّهُ،

يَا أَيُّهَا النَّاسُ اتَّقُوا رَبَّكُمُ الَّذِي خَلَقَكُمْ مِنْ نَفْسٍ وَاحِدَةٍ وَخَلَقَ مِنْهَا
زَوْجَهَا وَبَثَّ مِنْهُمَا رِجَالًا كَثِيرًا وَنِسَاءً وَاتَّقُوا اللَّهَ الَّذِي تَسَاءَلُونَ بِهِ
وَالْأَرْحَامَ إِنَّ اللَّهَ كَانَ عَلَيْكُمْ رَقِيبًا .

يَا أَيُّهَا الَّذِينَ ءَامَنُوا اتَّقُوا اللَّهَ وَقُولُوا قَوْلًا سَدِيدًا يُصْلِحْ لَكُمْ أَعْمَالَكُمْ
وَيَغْفِرْ لَكُمْ ذُنُوبَكُمْ وَمَنْ يُطِيعِ اللَّهَ وَرَسُولَهُ فَقَدْ فَازَ فَوْزًا عَظِيمًا.

أَمَّا بَعْدُ؛ قَالَ اللَّهُ تَعَالَى : اْعُذْ بِاللَّهِ مِنَ الشَّيْطَانِ الرَّجِيمِ
وَأَنَّ هَذَا صِرَاطِي مُسْتَقِيمًا فَاتَّبِعُوهُ وَلَا تَتَّبِعُوا السُّبُلَ فَتَفَرَّقَ بِكُمْ

عَنْ سَبِيلِهِ....

[Al An'am: 153];

Para sedhèrèk muslimin, Jamaah Jum'at ingkang pinaringan rahmating Gusti Allah SWT.

Minangka pambukaning atur, mangga kita sami tansah ngunjukaken raos syukur wonten ngarsa dalem Allah SWT., awit sampun kathah nikmat peparangipun dhumateng kula dalasan panjenengan sedaya. Maliginipun nikmat hidayah Islam, séhat menapa déné kesempatan. Sahingga wonten ing wekdal lan ing panggénan mriki kita taksih saged nindakaken sapérangan dhawuhipun Allah SWT., inggih menika nindakaken ibadah Jum'at kanthi sesarengan (jamaah). Kanthi raos syukur ingkang makaten menika mugi Allah SWT., tansah hanambahi nikmat karunianipun dhumateng kita sedaya. Aamiin yaa rabbal'alamiin.

Sak lajengipun, minangka pendèrèkipun ingkang tansah setya tuhu, mangga sareng-sareng atur shalawat dalasan salam kunjuk dhumateng baginda Rasulullah Muhammad SAW, sumarambah dhumateng para keluarga ahlul baitipun, para sahabatipun, para tabi'in, ugi para tabi'utabi'in ngantos dumugi akhir zaman samangké. Lantaran makaten mugi kita sadaya badhé saged pikantuk safa'atipun kanjeng Nabi mbénjang wonten ing yaumul maksar. Aamiin yaa rabbal'alamiin.

Minangka jangkekipun rukun khotbah, al fakir khotib mboten bosen-bosen tansah atur pepémot dhumateng diri pribadi kula piyambak, sumarambah dhumateng para jamaah jum'at, kanthi atur, sumangga tansah ngiyataken iman, ningkataken taqwa kita dhumateng Allah SWT., supados iman taqwa kita saged mentes lan leres, amrih sami sembada anggènipun nindakaken paugeran gesang miturut satataning agami Islam. Agami ingkang dipun ridhai Allah SWT. Kanthi makaten mugi kita sadaya badhé pikantuk kabegjan, kabagyan wiwit ing dunya mriki ngantos mbénjang ing akhérat. Insya allah, aamiin yaa rabbal'alamiin.

Yektosipun namung kanthi taqwa ingkang saget hanjamin kita sedaya pikantuk derajat, panggénan éngkang minulya, celak kaliyan Allah SWT. Taqwa menika ugi minangka panggayuhanipun para Muslim ingkang paling inggil. Awit, kamulyanipun manungsa menika sanés kabobot saking derajat, pangkat, kasugihan, lan pakurmatan, nanging katraju saking ketaqwaanipun. Jumbuh kaliyan firmanipun Allah SWT:

يَا أَيُّهَا النَّاسُ إِنَّا خَلَقْنَاكُمْ مِنْ ذَكَرٍ وَأُنْثَىٰ وَجَعَلْنَاكُمْ شُعُوبًا وَقَبَائِلَ لِتَعَارَفُوا
إِنَّ أَكْرَمَكُمْ عِنْدَ اللَّهِ أَتْقَاكُمْ إِنَّ اللَّهَ عَلِيمٌ خَبِيرٌ

*Para manungsa kabèh, Ingsun wis gawé sira, wijiné saka wong lanang lan wadon, lan Ingsun ndadèkake pirang-pirang bangsa lan golongan supaya padha tepung (kenal) siji lan sijiné. **Déné mungguhé Allah, sira kang aji dhéwé, yaiku endi kang banget bektiné (taqwa) ing Allah.** Satemené Allah iku Nguningani samu barang tur Wicaksana. (QS. Al Hujurat [49] : 13)*

mBoten namung menika, salajengipun inggih kanthi taqwa ugi, Allah SWT badhé paring ridha dhumateng kita lan Allah badhé hambuka kori keberkahanipun saking langit lan bumi.

وَلَوْ أَنَّ أَهْلَ الْقُرَىٰ آمَنُوا وَاتَّقَوْا لَفَتَحْنَا عَلَيْهِم بَرَكَاتٍ مِّنَ السَّمَاءِ وَالْأَرْضِ وَلَكِن كَذَّبُوا فَأَخَذْنَاهُم بِمَا كَانُوا يَكْسِبُونَ ۝

"Lan saumpana ing negara mau wong-wong padha iman ing Allah lan utusané Allah, sarta padha bekti ing Allah, mesthi padha Ingsun wènèhi barokah saka langit lan saka bumi, nanging dhèwèké padha nggorohaké awit saka iku Ingsun banjur nurunaké siksa margi saka tumindaké dhéwé." (QS Al A'raaf [7] : 96).

Wonten ing ayat menika, Allah SWT mungkasi firmanipun kanthi paring pamawas bilih kasangsaran, kacintrakan, musibah, menapadéné karupekanipun manungsa awit saking anggènipun sami goroh ing babagan keimanan lan ketaqwaanipun dhumateng Allah SWT.

Hadirin jamaah Jum'ah rahimakumullah,

Kasunyatanipun ing sangajeng kita sampun gumelar manéka warni margi panggesangan. Wonten ingkang lempeng, sarta ugi ménggok. Wonten ingkang nganan, lan ugi wonten ingkang ngiring. Gumantung kita, badhé milih ingkang kados pundi. Ingkang baken, saben pilihan margi niku momot résikon piyambak-piyambak. Jumbuh kaliyan pangandikanipun kanjeng Nabi Muhammad SAW.:

كُلِّ النَّاسِ يَغْدُو؛ فَبَائِعٌ نَفْسَهُ فَمُعْتِقُهَا أَوْ مَوْبِقُهَا

"Saben rina kabèh manungsa ngluri marganing uripé dhéwé-dhéwé, lelungan nyorohaké awaké. Ana sing nylametaké awaké, lan ana uga sing nyilakani awaké!" (HR Muslim).

Salah satunggaling wekdal Abdullah bin Mas'ud ra. nuturaken: *"Rasulullah SAW. yasa gambar garis lempeng kanggo aku saréwang, banjur ngendika, iki pangimba dalané Allah, banjur Panjenengané yasa gambar garis-garis ing kiwa-tengené garis mau, terus paring sabda, iki dalan-dalan kang akéh. Ing saben dalan ana sétan kang ngajak murih padha ngliwati dalan iku. Banjur Panjenengané maos:*

وَأَنَّ هَذَا صِرَاطِي مُسْتَقِيمًا فَاتَّبِعُوهُ وَلَا تَتَّبِعُوا السُّبُلَ فَتَفَرَّقَ بِكُمْ عَن سَبِيلِهِ.....

'Lan satemené iki dalan Ingsun kang lempeng, awit saka iku, sira kabèh padha manuta (ngambaha) dalan iku, lan aja padha manut (ngambah) dalan liyané, jalaran yèn mengkono, sira tetep wong kang nyimpang saka agamaning (dalané) Allah...." [Al An'am, 6 : 153]; (HR Ahmad)

Awit saking menika, margi Islam mboten kathah. Namung setunggal. Inggih menika margi ingkang dipun tapaki déning Rasulullah SAW., para sahabat, lan para salafus shalih.

Hadirin Jama'ah Jumah Rahimakumullah

Mboten gampil nguri-uri istiqamah nalika napaki margi ingkang leres ing wekdal menika. Ageng sanget panggodhanipun. Panggodha duniawi bebasan datan kendat. Malahan ingkang merjuangaken kebeneran dipun tuding minangka pambiwara perkawis ingkang awon, ngandut masalah, ngganggu kebhinékaan, intoléran, radikal, lan sapiturutipun. Kawontenan menika kados wangsul dhumateng zaman jahiliyah, rikalanipun kanjeng Nabi SAW. lan para sahabat nedhengipun ambangun pondasi Islam ing Makkah. Dipun betahaken sikap istiqamah salebetipun ngadepi kawontenan menika. Sikap makaten niku saged tuwuh menawi:

Sepindhah: Hanggadhahi iman kanthi leres lan lempeng. Manunggal, jumbuh ing antawisipun keyakinan, ucapan lan tindakan (kapirsani: QS Ibrahim [14]: 27). Awit saking menika, paham lan keyakinan ingkang nyimpang saking Islam kadidéné materialisme (atèisme) lan sèkulèrisme—ingkang misahaken keyakinan Islam saking panggesangan—kedah kabucal satebih-tebihipun.

Kaping kalih: Hanjagi keikhlasan, namung karana Allah SWT. lan tansah hambudidaya murih tansah rumaket dhumateng syariah (kapirsani: QS al-Bayyinah [89]: 5). Kedah dipun émut bilih sétan mboten badhé saget hanggodha dhumateng tetiyang ingkang tansah ikhlas. (kapirsani QS al-Hijr [15]: 39-40)

Kaping tiga: Tansah ngaos, ngayati lan ngamalaken sedaya isi al-Quran (kapirsani: QS an-Nahl [16]: 102; QS al-Furqan [25]: 32). Sebab, sawenèhipun tiyang mboten badhé saged mlampah lempeng tanpa memahami lan ngamalaken isinipun al-Quran.

Kaping sekawan: Réncang lan lingkungan ingkang shalih. Allah SWT mratélakaken wonten ing al-Quran bilih salah satunggaling sebab ingkang baken ingkang saged ngiyataken para sahabat inggih menika cumondhokipun Rasulullah SAW. ing tengah-tengahipun para sahabat. Allah SWT. ugi paring dhawuh supados kita tansah sesarengan kaliyan tiyang-tiyang ingkang saé. (kapirsani: QS at-Taubah [9]: 119).

Kaping gangsal: Tansah ngaji lan ngayati kisah-kisahipun tiyang shalih ingkang sampun kapengker, sahingga saged kadadosaken teladan salebeting nglampahi istiqamah.

Kaping nenem: Ngathahaken doa dhumateng Allah SWT. supados dipun paringi keistiqamahan. Allah SWT. remen ngalembana dhumateng tiyang-tiyang ingkang iman ingkang tansah ndedonga dhumateng Panjenenganipun kanggé nyuwun kateguhan iman rikalanipun ngadepi ujian (kapirsani: QS Ali 'Imran [3]: 146-148; QS al-Baqarah [2]: 250; QS Ali Imran [3]: 8). Doa ingkang paling asring dipun panjataken déning kanjeng Nabi SAW. inggih menika, "**Ya Muqallib al-qulûb, tsabbit qalbî 'alâ dînik** (Duhai Zat ingkang kasdu mbolak-balikaken manah, mugi kateguhna manah kula dhumateng agami Panjenengan." (HR at-Tirmidzi).

Kajawi kedah istiqamah ing salebeting diri, satunggalipun perkawis ingkang mboten angsal dipun lirwakaken, inggih menika istiqamah salebeting ndakwahaken Islam. Menawi sapérangan tiyang mastani 'harga mati', pramila dakwah harga matipun Islam. Dakwah mboten angsal mendha utawi lerem. Dakwah kedah tansah dipun kumandhangaken sanajan kathah tiyang ingkang nentang Islam.

Pramila dipun betahaken para pejuang lan pangemban dakwah ingkang tansah istiqamah. Inggih menika pendakwah ingkang namung mundhut, migunakaken lan nuruti pemikiran Islam, sinartanan mbucal pemikiran sak sanèsipun Islam. Menapa menika pemikiran perkawis syariah, sistem pemerintahan Islam (khilafah), jihad lan sanès-sanèsipun. Sedaya menika minangka ajaran Islam ingkang kedah dipun byawarakaken dhumateng umat.

Sewalikipun, para da'i kedah mbucal ingkang satebih-tebihipun, pemikiran ingkang mboten saking Islam, kados sèkularisme, démokrasi, HAM, pluralisme, liberalisme, fèminisme, lan sapanunggalanipun.

Akhiripun, kita umat Islam wajib rumaos kaiket kaliyan sedaya ajaran Islam. Islam lan kaum Muslimin kedah saged dados mercusuar peradaban. Awit kita minangka umat paling unggul, **khairu ummah**. Ampun kesupèn bilih Rasulullah SAW. mboten naté ngajaraken dhumateng kita supados dados manungsa ingkang méncla-ménclé. Panjenenganipun malah majibaken dhumateng kita murih istiqamah ing salebeting Islam.

Namung kanthi gegondhélan kanthi kenceng dhumateng al-Quran lan Sunnah, kita badhé mapan terus ing margi ingkang leres. Mongga dipun émut sabdaipun kanjeng Nabi Muhammad SAW.:

تَرَكْتُ فِيكُمْ مَا إِن تَمَسَّكْتُمْ بِهِ لَنْ تَضِلُّوا بَعْدِي أَبَدًا كِتَابَ اللَّهِ وَسُنَّتِي

“Ingsun tinggalaké kanggo sira kabèh, sawijining perkara. Menawa sira kabèh hanggondèli perkara kasebut kanthi kenceng, sira ora bakal kejlomprong salawasé, déné perkara iku yaiku, Kitab Allah lan Sunnahku” (HR Imam Malik)

Mugi-mugi Allah SWT. tansah neguhaken langkah tindak kita, dados tiyang-tiyang ingkang istiqamah wonten salebeting agami Islam lan tansah terus ngumandangkan Islam dhumateng saindenging dunya.

Jamaah Jum'at ingkang pinaringan rahmating Gusti Allah SWT.

Makaten ingkang saged kula aturaken ing khutbah Jum'at menika. Hanglenggana bilih sedaya kasampurnan namung kagunganipun Allah SWT. samukawis atur kula ingkang leres awit pitedah saking Allah SWT., lan Rasulipun, mangga kita gondhèli kanthi saèstu. Samukawis atur kula ingkang lepat, awit saking kirangipun pangertosan pribadi kula, mangga kita bucal sak tebihipun, lan mugi panjenengan sedaya kersa hanglubèraken samudra pangaksami.

Pepuntonipun atur, mangga kita pungkasi khutbah menika kanthi ndedonga sesarengan, mugi kita sedaya tansah pinaringan panjang yuswa, séhat lahir batin, manfaat dunya akhérat. Pinaringan hidayah, inayah lan kekiyatan, sahéngga saged dados péranganipun ahli dhakwah, ingkang tansah sengkut ngrembakakaken jejegipun syariat agamani Islam ing salebeting daulah Islamiyah, tansah setya tuhu dhumateng patuladhanipun kanjeng Nabi Muhammad SAW. ngantos puput yuswa kanthi kawontenan husnul khatimah, aamiin ya rabbal'alamiin.

بَارَكَ اللهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ
الْآيَةِ وَذِكْرِ الْحَكِيمِ وَتَقَبَّلَ اللهُ مِنَّا وَمِنْكُمْ تِلَاوَتَهُ وَإِنَّهُ هُوَ السَّمِيعُ
الْعَلِيمُ، وَأَقُولُ قَوْلِي هَذَا فَاسْتَغْفِرُ اللهَ الْعَظِيمَ إِنَّهُ هُوَ الْغَفُورُ الرَّحِيمُ

Khutbah II

الْحَمْدُ لِلَّهِ عَلَى إِحْسَانِهِ وَالشُّكْرُ لَهُ عَلَى تَوْفِيقِهِ وَامْتِنَانِهِ. وَأَشْهَدُ أَنْ
لَا إِلَهَ إِلَّا اللهُ وَاللهُ وَحْدَهُ لَا شَرِيكَ لَهُ وَأَشْهَدُ أَنَّ سَيِّدَنَا مُحَمَّدًا عَبْدُهُ
وَرَسُولُهُ الدَّاعِي إِلَى رِضْوَانِهِ. اللَّهُمَّ صَلِّ عَلَى سَيِّدِنَا مُحَمَّدٍ وَعَلَى
آلِهِ وَأَصْحَابِهِ وَسَلِّمْ تَسْلِيمًا كَثِيرًا
أَمَّا بَعْدُ ۝

فَيَا أَيُّهَا النَّاسُ اتَّقُوا اللَّهَ فِيمَا أَمَرَ وَانْتَهُوا عَمَّا نَهَى وَاعْلَمُوا أَنَّ اللَّهَ
أَمَرَكُمْ بِأَمْرٍ بَدَأَ فِيهِ بِنَفْسِهِ وَثَنَى بِمَلَأَ بُكْتِهِ الْمَسْبُوحَةِ بِقُدْسِهِ وَقَالَ
تَعَالَى إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ آمَنُوا صَلُّوا
عَلَيْهِ وَسَلِّمُوا تَسْلِيمًا.

اللَّهُمَّ صَلِّ عَلَى سَيِّدِنَا مُحَمَّدٍ صَلَّى اللَّهُ عَلَيْهِ وَسَلَّم وَعَلَى آلِ سَيِّدِنَا
مُحَمَّدٍ وَعَلَى أَنْبِيَائِكَ وَرُسُلِكَ وَمَلَائِكَةِ الْمُقَرَّبِينَ وَارْضَ اللَّهُمَّ عَنِ
الْخُلَفَاءِ الرَّاشِدِينَ أَبِي بَكْرٍ وَعُمَرُ وَعُثْمَانُ وَعَلِيٌّ وَعَنْ بَقِيَّةِ
الصَّحَابَةِ وَالتَّابِعِينَ وَتَابِعِي التَّابِعِينَ لَهُمْ بِإِحْسَانٍ إِلَى يَوْمِ الدِّينِ
وَارْضَ عَنَّا مَعَهُمْ بِرَحْمَتِكَ يَا أَرْحَمَ الرَّاحِمِينَ
اللَّهُمَّ اغْفِرْ لِلْمُؤْمِنِينَ وَالْمُؤْمِنَاتِ وَالْمُسْلِمِينَ وَالْمُسْلِمَاتِ الْأَحْيَاءِ
مِنْهُمْ وَالْأَمْوَاتِ اللَّهُمَّ أَعِزَّ الْإِسْلَامَ وَالْمُسْلِمِينَ وَأَذِلَّ الشِّرْكَ
وَالْمُشْرِكِينَ وَأَنْصُرْ عِبَادَكَ الْمُوَحِّدِيَّةَ وَأَنْصُرْ مَنْ نَصَرَ الدِّينَ
وَاخْذُلْ مَنْ خَذَلَ الْمُسْلِمِينَ وَ دَمِّرْ أَعْدَاءَ الدِّينِ وَاعْلِ كَلِمَاتِكَ إِلَى
يَوْمِ الدِّينِ.

اللَّهُمَّ ادْفَعْ عَنَّا الْبَلَاءَ وَالْوَبَاءَ وَالزَّلَازِلَ وَالْمِحْنَ وَسُوءَ الْفِتْنَةِ
وَالْمِحْنَ مَا ظَهَرَ مِنْهَا وَمَا بَطَنَ عَنْ بَلَدِنَا إِنْدُونِيسِيَا خَاصَّةً وَسَائِرِ
الْبُلْدَانِ الْمُسْلِمِينَ عَامَّةً يَا رَبَّ الْعَالَمِينَ. رَبَّنَا آتِنَا فِي الدُّنْيَا حَسَنَةً
وَفِي الْآخِرَةِ حَسَنَةً وَقِنَا عَذَابَ النَّارِ. رَبَّنَا ظَلَمْنَا أَنْفُسَنَا وَإِنْ لَمْ
تَغْفِرْ لَنَا وَتَرْحَمْنَا لَنَكُونَنَّ مِنَ الْخَاسِرِينَ.

عِبَادَ اللَّهِ ! إِنَّ اللَّهَ يَأْمُرُنَا بِالْعَدْلِ وَالْإِحْسَانِ وَإِيتَاءِ ذِي الْقُرْبَى وَيَنْهَى
عَنِ الْفَحْشَاءِ وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ وَادْكُرُوا اللَّهَ
الْعَظِيمَ يَذْكُرْكُمْ وَاشْكُرُوهُ عَلَى نِعَمِهِ يَزِدْكُمْ وَلَذِكْرُ اللَّهِ أَكْبَرُ